



O'ZBEKISTON RESPUBLIKASI
ADLIYA VAZIRLIGIDA
DAVLAT RO'YXATIDAN O'TKAZILDI
RO'YXAT RAQAMI: 2696-5
2025 - yil 23 - Dekabr

O'ZBEKISTON RESPUBLIKASI MARKAZIY BANKI BOSHQARUVINING QARORI

Tijorat banklarida aktivlar sifatini tasniflash va aktivlar bo'yicha ehtimoliy yo'qotishlarni qoplash uchun zaxiralar shakllantirish hamda ulardan foydalanish tartibi to'g'risidagi nizomga o'zgartirishlar va qo'shimcha kiritish haqida

O'zbekiston Respublikasining "O'zbekiston Respublikasining Markaziy banki to'g'risida"gi va "Banklar va bank faoliyati to'g'risida"gi qonunlariga muvofiq O'zbekiston Respublikasi Markaziy banki boshqaruvi **qaror qiladi:**

1. O'zbekiston Respublikasi Markaziy banki boshqaruvining 2015-yil 13-iyundagi 14/5-son qarori (ro'yxat raqami 2696, 2015-yil 14-iyul) (O'zbekiston Respublikasi qonun hujjatlari to'plami, 2015-y., 28-son, 374-modda) bilan tasdiqlangan Tijorat banklarida aktivlar sifatini tasniflash va aktivlar bo'yicha ehtimoliy yo'qotishlarni qoplash uchun zaxiralar shakllantirish hamda ulardan foydalanish tartibi to'g'risidagi nizomga ilovaga muvofiq o'zgartirishlar va qo'shimcha kiritilsin.

2. Mazkur qaror rasmiy e'lon qilingan kundan e'tiboran bir oydan keyin kuchga kiradi.

O'zbekiston Respublikasi
Markaziy banki Raisi
2025-yil 5-dekabr
31/10-son



ISHMETOV TIMUR
AMINDJANOVICH

O'zbekiston Respublikasi Markaziy
banki boshqaruvining 2025-yil 5-dekabrdagi
31/10-son qaroriga
ILOVA

**Tijorat banklarida aktivlar sifatini tasniflash va aktivlar bo'yicha
ehtimoliy yo'qotishlarni qoplash uchun zaxiralar shakllantirish
hamda ulardan foydalanish tartibi to'g'risidagi nizomga
kiritilayotgan o'zgartirishlar va qo'shimcha**

1. 28-bandning beshinchi xatboshisi quyidagi tahrirda bayon etilsin:

“aktivning asosiy qismi va (yoki) foizlarining to'lash muddati kechiktirilishi yoki uzaytirilishi, mijozni moliyalashtirishni boshlash muddati o'zgarishi hisobiga to'lov grafigining yoki to'lovlar to'lanadigan oy ichida to'lov sanasining o'zgartirilishi hamda mazkur Nizomning 33⁸-bandida belgilangan holatlarda to'lovlar muddati kechiktirilishi yoki uzaytirilishi bundan mustasno;”.

2. Quyidagi mazmundagi 4²-bob bilan to'ldirilsin:

“4²-bob. To'lovlar muddati kechiktirilgan yoki uzaytirilgan kreditlar sifatini tasniflash

33⁸. Qarz oluvchining murojaatiga ko'ra bank tomonidan kredit shartnomasi muddati mobaynida to'lovlar muddati birinchi marotaba quyidagi holatlar natijasida kechiktirilganda yoki uzaytirilganda kredit tasnifi o'zgartirilmaydi va shartlari qayta ko'rib chiqilgan aktivlar deb tasniflanmaydi:

qarz oluvchining ikki oydan ortiq davr mobaynida vaqtincha mehnatga layoqatsiz bo'lib qolishi;

qarz oluvchining mehnat shartnomasi bekor qilinishi va ish qidirayotgan shaxs sifatida tuman (shahar) kambag'allikni qisqartirish va bandlikka ko'maklashish bo'limlarida ro'yxatga olinishi;

qarz oluvchining birgalikda qarz oluvchisi va (yoki) kafili bo'lgan turmush o'rtog'i vafot etishi;

I yoki II guruh nogironligi bo'lgan shaxslar qarz oluvchining qaramog'iga olinishi yoki uning qaramog'idagi I yoki II guruh nogironligi bo'lgan shaxslar sonining ortishi;

qarz oluvchiga nisbatan nogironlikning I yoki II guruhi belgilanishi;

tabiiy hamda texnogen xususiyatli favqulodda vaziyatlarning yuzaga kelishi;

qarz oluvchining homiladorlik va tug'ish ta'tiliga chiqishi.

Bunda, mazkur bandning ikkinchi va uchinchi xatboshilarida nazarda tutilgan holatlar yuzasidan qarz oluvchi tomonidan kredit shartnomasi bo'yicha to'lovlar muddatini kechiktirish yoki uzaytirish to'g'risida bankka murojaat qilinganda mazkur murojaat sanasidan oldingi ikki oy davomida qarz oluvchining o'rtacha oylik daromadlari so'nggi o'n ikki oy ichidagi o'rtacha oylik daromadlariga nisbatan kamida 30 foizga kamaygan bo'lishi lozim.

Mazkur bandning ikkinchi-sakkizinchi xatboshilarida belgilangan holatlar qarz oluvchi kredit shartnomasi bo'yicha to'lovlar muddatini kechiktirish yoki uzaytirish yuzasidan bankka murojaat qilgan sanadan oldingi to'rt oy ichida ro'y bergan bo'lishi lozim.

Kredit tasnifi o'zgartirilmasligi va shartlari qayta ko'rib chiqilgan aktivlar deb tasniflanmasligi uchun kredit shartnomasi bo'yicha to'lovlar mazkur bandning:

ikkinchi–yettinchi xatboshilarida belgilangan holatlarda 6 oydan;

sakkizinchi xatboshisida belgilangan holatda 10 oydan ko'p bo'lmagan muddatga kechiktirilgan yoki uzaytirilgan bo'lishi lozim.

33⁹. Bank qarz oluvchining murojaatiga ko'ra kredit shartnomasi bo'yicha to'lovlar muddatini kechiktirish yoki uzaytirishda qarz oluvchi tomonidan taqdim etilgan tasdiqlovchi hujjatlardan yoki boshqa ma'lumotlardan foydalanishi mumkin. Bunda, bank mazkur ma'lumotlarning haqqoniyligini tekshirish choralarini ko'rishi lozim.”.

3. 36¹-bandning ikkinchi xatboshisi quyidagi tahrirda bayon etilsin:

“Standart aktivlarga yaratiladigan zaxiralar sifati standart deb tasniflangan jami aktivlar qoldig‘iga nisbatan har oyning yakuniga qadar aktiv qaysi valyutada vujudga kelgan bo‘lsa, ushbu valyutada yoki milliy valyutada shakllantirilishi lozim.”.